

楊襄毅公本兵疏議

楊襄毅公本兵疏議卷之九

覆巡撫南贛都御史陸穩
立鎮建官

少保兼太子太保兵部尚書臣楊博等謹

題為添設縣治并請置總兵官以杜三省盜源事職方

清吏司案呈奉本部送兵科抄出巡撫南贛汀漳等

處地方提督軍務都察院右副都御史陸穩題奉

聖旨該部知道欽此又該巡按江西監察御史段顧言題

為乞增置文武將吏重彈壓以專責成事奉

聖旨兵部知道欽此欽遵通抄送司案呈到部看得巡撫

南贛汀漳等處右副都御史陸穩巡按江西監察御

史段顧言各題稱潮汀南贛三省之交去各道府鎮巡衙門甚遠藏奸伏慝乞要與程鄉興寧等四縣連界處所初立鎮城添設副總兵在巡撫則欲就以南贛叅將俞大猷充任叅將員缺不必推補止補守備一員并添設縣學在御史則欲于新立鎮城再添設兵備一員汀漳緊要地方添設叅將或遊擊一員長沙營羊角堡各添設把總一員廣東添設巡撫江西袁吉添設兵備各一節除設立縣治係戶部儒學係禮部移咨該部徑自議覆外為照程鄉興寧安遠武平四縣接界地方分屬三省該管官司相去寫遠號

令不及姦宄易生先年雖有通判之議事權未重委
難展布所據添設副總兵及兵備把總等官并南贛
止設守備等項事宜審時度勢俱非獲已至于袁吉
一路又湖粵往來要冲先事之備尤當預講既該撫
按等官都御史陸穩等具題前來計處已當但段顧
言欲於廣東添設巡撫汀漳添設叅將二事查得廣
西有可用之兵而無糧廣東有可資之糧而無兵先
年止設提督兼理巡撫蓋有深意汀漳近日既已設
有副總兵所據叅遊似難再設相應通行議擬合候
命下將程鄉興寧等四縣適中處所初立鎮城伏乞

欽賜營名添設副總兵一員候副總兵俞大猷征勦廣東
福建回日就充其任專一駐劄該城一面於南贛南
韶惠潮汀漳柳桂撫州各府州縣募兵并旗軍內撥
給五千名南贛汀漳惠潮各叅備等官俱聽節制平
時嚴行巡緝有警隨宜調遣合用 勅書旗牌關防
通行請給南贛叅將改設守備長沙營羊角水堡各
添設把總一員鎮城仍添設兵備一員移咨吏部徑
自推補其袁吉一路兵備止將江西屯田僉事加增
兵備職銜移駐袁州本部各另定擬責任應請
勅者照例請給應劄付者徑自劄付合用俸糧柴薪公

舖舍等項悉聽撫按官以次脩舉嘉靖四十一年五月十六日題奉

聖旨准議行營名與做伸威欽此

申飭兩廣等處督撫諸臣乘勝亟勦逆寇疏

題為督撫諸臣重蒙 恩賚懇乞

天語申飭以收全捷事職方清吏司案呈照得近日平和之捷首挫賊鋒仰蒙

皇上勅下本部將效勞諸臣通行加賞此誠

玄謀淵筭鼓舞激勵之大機也但恐人心懈弛狃於小勝反妨大計呈乞申飭案呈到部看得

朝廷之上宰制宇內全在賞罰二典有功者雖微必賞
賞不踰時固不以罪而掩其功有罰者雖微必罰罰
不遷刻亦不以功而略其罪譬之持衡因物低昂何
容心焉頃者逆璉無狀攻擾平和一時諸臣乃能攄
忠宣力挫其鋒銳不過封疆之常職耳我

皇上乃曲垂軫念遍加賞賚遠近聞之翕然稱慶以為注
措如此蠢茲狂悖不足滅矣但臣等偶有愚見人心
多狃於一勝兵家貴出於萬全卽今大兵雲集正當
會勦之時若使督撫諸臣乘此一捷之威犁巢掃穴
從重論敘固難吝惜萬一驕於前功漫無後效則

上負 聖恩下失民望其罪自無容辭謹始慮終委
當通行申飭合候

命下本部馬上差人齎文交與提督兩廣侍郎張臬總兵
官平江伯陳王謨提督南贛都御史陸穩副總兵俞
大猷等既蒙雨露之恩賞賚異常務要會同總兵官
劉顯同心協力或臨兵索戰分何精銳制彼方張之
勢或堅壁不出作何計處免致老我之師務將逆賊
張璉等刻期蕩平而後朝食有功之日定行超格陞
賞如或因循玩愒致悞地方雷霆之威
國典具在有非臣等所敢言者均乞

聖裁嘉靖四十一年五月二十一日題奉

聖旨便行與督撫等官協心勦滅逆賊以靖地方不許玩
愒取罪欽此

覆督視督撫等官侍郎葛縉等遼東獻捷陞賞疏
題爲仰仗 天威官軍奮勇斬獲達賊首級數多飛報
捷音事職方清吏司案呈奉本部送兵科抄出督視
遼東軍務兵部左侍郎兼都察院右僉都御史葛縉
總督薊遼保定等處軍務兼理糧餉兵部右侍郎兼
都察院右僉都御史楊選巡撫遼東地方兼贊理軍
務都察院右僉都御史吉澄題俱奉

聖旨兵部看了來說欽此通抄送司查得

大明會典內一款一報捷官舍人等以擒斬虜賊多寡為等第七十名顆以上賞衣服一套九十五名顆以上賞鈔一千貫陞一級一百一十名顆以上賞衣服一套陞試所鎮撫欽此又查得督視侍郎葛縉差千戶李茂總督侍郎楊選差承差崔錫巡撫都御史吉澄差百戶王璽鎮守總兵官吳瑛差千戶郭勳各報捷音通查案呈到部看得督視遼東軍情本部左侍郎葛縉題稱本年五月初九等日達賊二股從東州堡撫順等處進入搶掠官軍奮勇斬獲首級一百四十

九顆奪獲達馬五十七匹夷器不計其數各賊退遁
出境及稱巡撫都御史吉澄副總兵黑春所當首錄
遊擊徐維忠備禦劉普所當併錄總兵官吳瑛所當
重賞分巡僉事張邦土分守叅議張廷槐所當併賞
總督侍郎楊選本部郎中張志孝所當另錄及該總
督撫鎮等官侍郎楊選都御史吉澄總兵官吳瑛所
奏查與葛縉大略相同內稱督視侍郎葛縉功當首
論巡按御史楊栢戶部郎中趙賢勞皆有與各一節
除巡按御史例不論功外為照遼東地方頻年以來
水旱相仍兵食俱困在五路軍民則微萌殘孽僅存

生息在三面夷虜則交馳並驚極其殘傷告急之文
無減右衛之後窘迫之狀真成左輔之憂仰賴

聖明在上穆然遠覽特遣重臣出關督視一切兵糧脩築
事宜悉從擘畫宸謀允臧玄威丕振以致官軍奮
勇斬首多至一百四十有奇寔惟九邊少見之事大
舉之酋既已喙息弗遑小窺之醜自當遁避不暇
神功聖武臣等淺昧曷所揄揚伏望

皇上擇日謝玄以昭休貺以慰群情臣等無任懸切瞻仰
之至所據一時效勞人員如督視侍郎葛緒臨邊未
及閱月幹理真無停時任事之忠殊為可尚克捷之

功寔當首稱其餘總督撫鎮等官楊選等既該葛縉
分別明白具題前來係干激勸相應通行議擬合候
命下將葛縉重加獎賞楊選吉澄吳瑛重加賞賚張志孝
同加賞賚黑春超格陞賞徐維忠劉普重加陞賞張
邦土張廷槐趙賢量加賞賚差來人役照例陞賞其
餘獲功人役備咨都察院轉行彼處巡按御史覈明
至日另議甄錄惟復將葛縉等照例通候勘明一併
議處及照首級一百一十顆以上例該宣捷恭遇免
朝合無暫從停免均乞

聖裁嘉靖四十一年五月二十四日題奉

聖旨是這斬獲數多仰賴

上玄洪佑人得用力葛繒楊選吉澄吳瑛各賞銀五十兩
紵絲二表裏張志孝銀十兩一表裏黑春陞三級還賞
銀三十兩紵絲二表裏徐維忠劉普陞二級銀二十兩
一表裏張邦土等各銀五兩欽此

覆山東巡按御史劉存義條陳飭海防嚴界限疏
題爲敷陳末議豫安重地事職方清吏司案呈奉本部
送戶科抄出巡按山東監察御史劉存義題奉

聖旨該部看了來說欽此欽遵抄出送司案呈到部看得
巡按山東監察御史劉存義條陳二事合就開立前

件議擬上請定奪嘉靖四十一年六月初一日題奉
聖旨准議行欽此

一飭海防以戒不虞臣等看得山東海防邇年以來
疎略特甚在衛官軍苦於京操之繁難沿海姦民樂
於通遼之便利萬一倭夷因而出沒亡命爲之引誘
地方伏禍委在可慮所據御史劉存義所論無非思
患預防之意合無依其所擬移咨山東巡撫都御史
督同守巡巡察備倭等官趁今無事之時將海防一
應事宜從長計處衛所凋殘作何整飭兵馬單弱作
何補湊城堡圯壞作何脩繕錢糧匱缺作何處置應

奏請者作速奏請應施行者徑自施行以後沿海小民私自通遼者嚴加禁革各島夷人出沒生事者卽便勦除如敢仍前玩愒悉聽巡按御史從實叅究一嚴界限以責防守臣等看得山東地方與南北直隸河南三省接壤封疆之臣無事則漫無經畫有警則互相推調殊非事體所據御史劉存義所論無非盡地責成之意合無依其所擬備行南北直隸河南山東各巡撫都御史通將所轄接境界限各委賢能官員會同查明刊立界至責令各該府州縣衛所掌印巡捕等官各照定界加意防守或申明保甲或互

相聲援不許自分彼此如再仍前玩愒以致地方失
事聽各該巡按御史查究所由一體從重叅治
議遼東陣亡副總兵黑春卹典疏

題爲聲息事職方清吏司案呈奉本部送准督視遼東
軍情兵部左侍郎兼都察院右僉都御史葛縉揭帖
到部送司卷查先該巡按直隸監察御史楊惟平題
內開建昌副總兵蔣承勛陣亡該本部覆奉

聖旨蔣承勛死事可憫贈都督同知廕一子與做正千戶
世襲立祠陞襲俱照例行欽此今該前因查呈到部看
得近來邊將每遇虜入往往嬰城堅壁不肯一戰以

敵虜勢益驕我兵日怯今遼陽副總兵黑春生長塞
外義勇天植考其歷官以來每出必戰每戰必勝夷
情亦甚憚之卽如近日撫順之捷斬獲多至一百四
十有奇荷蒙

皇上俯垂軫念特陞三級本官感戴

天恩方圖報稱不意五月二十一日復遇大虜力戰死之
一念之精忠可以動天地可以質鬼神一時之雄略
可以勵諸邊可以警群醜若待勘明至日方行錄恤
似不足以慰其忠魂旣該督視侍郎葛繕揭報前來
又經該司查有蔣承勛事例相應通行議擬合候

命下將黑春贈都督同知另陞一子與做正千戶世襲仍
立祠死所歲時致祭應襲兒男照例襲陞三級巡撫
衙門先給棺殮銀五十兩以示優異及照副總兵旣
缺彼中兵馬無人統束關涉甚重侍郎葛縉欲將寧
前遊擊楊照獨石叅將劉國燕河營副總兵佟登陞
調前缺三人者委為可用之材但獨石燕河均屬重
地劉國佟登似難輕動合無將遊擊楊照以都指揮
僉事充分守遼陽副總兵本部備查原擬責任請給
勅書一道齎赴本官欽遵行事合用 符驗旗牌就彼交
代一面移咨都察院轉行巡按御史楊栢通將賊經

地方逐一查勘失事獲功人員應參應錄從實回奏
并將楊照原勘事情一併勘報遺下遊擊員缺另行
推補嘉靖四十一年六月初五日題奉

聖旨是黑春奮勇力戰死事可憫准贈都督同知廕一子
與做正千戶世襲立祠陞襲俱照例行堪任副總兵的
你部裏還酌議來說欽此

覆都給事中張益等論遼東損將罰治邊臣疏
題爲遼東被賊殺死總兵把總官乞

賜亟罪邊臣事職方清吏司案呈奉本部送兵科抄出兵
科都給事中張益等題奉

聖旨兵部知道欽此又奉本部送該本部題准督視遼東
軍情兵部左侍郎兼都察院右僉都御史葛繒揭帖
爲聲息事內稱本年五月內達賊從遼陽湯站堡地
方媳婦山入境攻鳳凰城副總兵黑春對敵陣亡查
得新推寧前遊擊楊照獨石叅將劉國燕河管副總
兵佟登堪以陞調乞要就近速補以濟緩急等因該
本部議得獨石燕河均屬重地劉國佟登似難輕動
合無將遊擊楊照以署都指揮僉事充分守遼陽副
總兵原劾事情仍聽巡按御史作速勘報節奉

聖旨堪任副總兵的你部裏還酌議來說欽此抄捧選司

案呈到部看得本年五月二十一日遼陽媳婦山鳳凰城地方副總兵黑春陣亡于時督視鎮巡官見奉明旨俱劄寧前一帶脩築墩堡一在遼河之東一在遼河之西相去八九百里縱使一聞警報星馳應援固已緩不及事止緣封疆諸臣前日奏捷旣嘗以職事而受其賞今日失事自當以職事而同其罰內侍郎葛綰督視軍情雖與該鎮有間責亦難辭該科通將各官并楊照張承勛參論前來具見謹邊政飭國體之意為照楊照賦性乖僻所至於人爭論粗心浮氣誠為可惡但其操守未失勇略亦著該鎮人心頗

歸向之葛縉吉澄等屢薦其賢無非為地方使過之
意臣等待罪本兵每遇各鎮將領員缺大率多用守
臣薦舉之人一則以所聞不如所見之真一則以守
臣利害切身自舉其屬必然詳慎卽如近日福建副
總兵以總督胡宗憲之薦而用楊縉延綏副總兵以
巡撫孫慎之薦而川徐仁開誠布公不敢不勉茲者
遼陽副總兵一事伏蒙

皇上特命臣等酌議仰見宸衷所注慎重邊臣相應與
鎮巡等官通行議擬題請合候

命下將葛縉特加戒飭楊選量加罰治吳瑛吉澄重加罰

治本部移咨都察院轉行遼東巡按御史楊栢通將
賊經地方逐一查勘要見損傷官軍若干搶擄人言
若干應容應錄人員分別明白從實回奏其張承勛
原未授有官職止是宣大軍門隨宜委用合無將楊
照華去署都指揮職銜充為事官暫管分守遼陽副
總兵事候勘明之日果無干碍或立有奇功聽督撫
官另行奏請如或玩愒罔效一體重治惟復將楊照
罷斥聽勘副總兵員缺另行照例推補均乞

聖裁嘉靖四十一年六月初八日題奉

旨是荷縉著用心督視楊選罰俸一箇月吳瑛吉澄兩

箇月楊照准充為事官管副總兵事欽此

覆江西紀功御史段願言等飛報擒獲逆賊張璉等恭請獻俘并議處善後事宜疏

題為仰仗 天威逆賊授首恭先飛報捷音上慰

聖懷南顧事職方清吏司案呈奉本部送兵科抄出巡按江西監察御史段願言題又該巡撫南贛汀漳等處地方提督軍務都察院右副都御史陸穩題為擒獲謀反大逆賊首飛報捷音事俱奉

聖旨兵部看了來說欽此欽遵抄出送司卷查先該提督兩廣侍郎張臬題內稱會勦之兵分為六哨並進等

因該本部覆奉

欽依馬上差人齎文交與張臬并南贛都御史陸穩福建
都御史游震得各照所定適中地方隨宜駐劄併力
進勦又該本部題議將署都督僉事劉顯充總兵官
署都指揮僉事俞大猷充副總兵官帶領部兵叅兵
前去廣東會同張臬陳王謨陸穩速將張璉等巢穴
剷期搗滅如果賊平徑赴福建征勦山海寇盜奉
旨都依議行劉顯等著上緊前去進勦不許怠緩欽此
俱經欽遵外今該前因查呈到部看得江西等處紀
功監察御史段顧言提督南贛汀漳右副都御史陸

穩各題稱擒獲逆賊張璉蕭雪峰等緣由在御史又要行令兩廣侍郎張梈將張璉等綁赴京師明正典刑或以道遠疎虞別有處分各一節為照唐東逆賊張璉本以編民曾充斗庫多招亡叛明懷不軌之謀妄自尊崇大犯無將之戒或開科取士而鼓動人心或僭號紀元而擅專刑殺攻城破縣千里為之丘墟鑄印授官一方因而嚮應蓋世之惡役載不容滔天之罪神人共憤其次則蕭雪峰再次則羅袍楊舜並立稱雄相助為靈論情殊無可原據法均在不赦封疆之臣不能及早撲滅追禍養患者已數年矣仰賴

聖皇在上俯納侍郎張臬等之奏赫然一怒屢

勅臣等嚴行閩廣南贛諸臣刻期進勦玄威丕振諸蠻寒
膽於南邦

聖武聿昭二兇授首於北闕一舉而漳南告捷渠魁張璉
等居然就縛斬首二百餘級再舉而嶺外奏功賊首
蕭雪峰等以次成擒斬首七十餘級御史段顧言謂
鋒刃無過殺之慘玉石無俱焚之殃

上天之和氣不干下民之生業允冀誠為確論臣等竊惟
此舉寰宇快觀夷夏欣仰誠為非常之事伏望

皇上擇日謝玄以答

上穹之眷以慰率土之心臣等無任惓惓懇祈之至及照
逆賊張璉蕭峯元惡大憝委與尋常強賊不同合
無照依段顧言所議行令張梟等檻解來京處以極
刑獻俘傳首仍候禮部臨期具議開奏定奪羅袍楊
舜姑令就彼會官處決再照彼中逆首雖已成擒諸
巢之孽尚未盡除歸正之衆尚未計處功罪人員尚
未勘報是三事者係干地方俱不容緩合無聽本部
一面移咨都察院轉行紀功御史段顧言會同江西
福建廣東各該巡按御史先將有功有罪者逐一覈
勘明實應錄應究作速具奏不得遲緩一面移咨兩

廣福建江西各軍門公同協贊段顧言副將俞大猷等乘此全勝之威即將諸巢刻期蕩平投降之人隨宜安插既不宜輕縱伏虎自貽伊感亦不宜妄錙嘉穀以失群望一切善後事宜應徑行者徑自舉行應會奏者作速會奏其段顧言俞大猷通候廣東事寧之日另行議處劉顯仍照本部題准事理徑赴福建會同巡撫都御史游震得副總兵楊縉務將山海之賊設法剿滅立有奇功通行錄敘再照各該奏報人員奔馳萬里勤勞可憫况事體重大尤當優異合無照依一百二十顆以上奏捷事例稍候張集疏到容

題為陳時弊度虜情慮貽將來大患懇乞

聖明申勅臣工務懷永圖書實效以保萬世治安事職方
清吏司案呈奉本部送兵科抄出總督薊遼保定等
處軍務兼理糧餉兵部右侍郎兼都察院右僉都御
史楊選整飭薊州等處邊備兼巡撫順天等府地方
都察院右僉都御史徐紳題俱奉

聖旨該部知道欽此通抄送司案呈到部看得總督楊選
等條陳防秋事宜三事合就開立前件議擬上請定
奪嘉靖四十一年七月初四日題奉

聖旨是欽此

一免定居以待策應看得薊州巡撫每年防秋移駐昌平所以防衛京陵干係甚重但驕虜之情委難測度兵家之筭貴於活動合無移咨巡撫徐紳今歲防秋之時不必拘泥移駐昌平斟酌隨機應援冷口有警則駐冷口昌平有警則駐昌平不得顧此失彼責有所歸

一議遼兵以資應援看得石門一區切近畿輔委爲重地况遼東入衛兵馬原多係分布本區之數合無移咨總督楊選除遼東原留步兵四千不調外其馬兵三千見駐寧遠者如果石門一區有警聽其調入

應援若石門無警或別區有警未許一槩輕調

一定功次以便防守看得該鎮地方首當畿甸之衝其功不在俘獲全在保障原與各邊不同合無移咨總督楊選巡撫徐紳遵照本部先今題奉

欽依事理申諭該鎮將士以後大虜侵犯果能奮力堵回者雖無擒斬照依嘉靖三十三年古北口事例一體論功世襲如有貪割首級致賊深入失事者雖有擒斬之功仍行論罪

覆宣大總督尚書江東等報虜入邊隄備疏

題為聲息事職方清吏司案呈奉本部送准總督宣大

卷之五言

二

四

山西等處地方軍務兼理糧餉太子少保兵部尚書
兼都察院左副都御史江東巡撫大同地方贊理軍
務都察院右僉都御史陳其學揭帖前事巡按直隸
監察御史董學揭帖為傳報大舉聲息事等因通送
到司案呈到部看得卽目秋氣尚淺殘暑未退原非
醜虜深入之時乃今突至大同陽和地方其志雖欲
擄奪我田其意實欲牽制我師旣該總督尚書江東
巡撫都御史陳其學巡按御史董學具報前來中間
總督所稱發兵戰守事宜俱已得策臣等竊計此虜
旦夕必當出境但惟節鉞重臣此時貴在特立一意

宣府南山之備若將勁兵盡發於西萬一別虜分道
東下首尾自難相應腹心重地關係不輕相應通行
申飭合候

命下本部馬上差人齎文交與江東文書到日如果賊未
出邊仍住宣府就近調度不止洪蔚雖靈丘廣昌一
帶亦當約會保定鎮巡官表裏防範務保萬全如使
賊已出境星馳前赴懷來與同總兵官馬芳巡撫都
御史趙孔昭同心協力急為居庸四海冶未寧之備
不得為賊所誘顧彼失此有誤大計嘉靖四十一年
七月二十九日題奉

聖旨是欽此

議分布西北防秋兵馬疏

題為嚴飭西北兵馬以重防秋事職方清吏司案呈奉本部送准總督薊遼保定等處軍務兼理糧餉兵部右侍郎兼都察院右僉都御史楊選揭帖又准提督鴈門等關兼巡撫山西地方都察院右僉都御史楊宗氣咨為聲息事等因通送到司案呈到部臣等竊料今秋虜情第一則垂涎薊鎮其次則側目山西蓋緣宣大二鎮蕭條之甚無可刼掠保定三關阨隘之險難以突入以故薊鎮山西雖春夏之交猶當戒嚴

况茲秋高月朗萬一不慎未免墮其計中臣等待罪
本兵蚤夜籌畫食寢並廢已經節次申飭各該總督
鎮巡官在薊鎮則畫地分區步兵拒牆擺守騎兵按
伏援應以守為戰在宣府則山南山北添布兵馬在
大同則遠哨廣備清野堅壁在山西則嚴拒陽方等
口在保定則分防紫荆等關以戰為守又慮獨石三
間旁白草川一帶實賊虜入薊必由之路責成叅將
劉國多方哨探不時馳報又恐畿輔地方倘有緊急
各處之兵不能卒至備行宣大總督江東移駐懷來
以備南山一帶宣府鎮巡官馬芳趙孔昭移駐隆慶

以便星馳抵關大同鎮巡官姜應熊陳其學候報移
駐懷來以便馳入居庸山西鎮巡官吳徵楊宗氣候
報移駐廣昌一以馳入紫荆一以聽援宣鎮保定巡
撫李遷移駐易州總兵官祝福移駐浮圖峪以便馳
入涿州京營選定兵馬三枝如果有警處給盔甲一
而啓行一面奏知至於一切戰守機宜臣等逐一叅
酌徑自舉行不敢一一煩瀆

天聽嘉靖四十一年八月初二日題奉

聖旨是還行與各該總督鎮巡等官相機防禦不許怠悞
欽此

覆巡撫甘肅都御史戴才莊浪土兵倡亂懲戒疏
題為將領等官過嚴以致土軍敢眾擅離營伍懇乞

聖斷以肅軍政事職方清吏司案呈奉本部送兵科抄出
巡撫甘肅等處地方都察院右僉都御史戴才題奉
旨兵部看了來說欽此抄出送司案呈到部看得巡撫
甘肅都御史戴才題稱本年三月內莊浪土軍馬宗
李住兒等擅離營伍緣由及叅土官指揮曾東患病
尅減監督倉場通判張相刑罰過重分守莊浪叅將
孟榮亦方太甚遂至沸騰乞要將曾東姑加戒飭仍
令指揮曾相百戶哈聰協同管理孟榮張相量為改

調或通行罷斥馬宗李住兒提問各一節為照前項
土軍鼓惑有衆擅離營伍中間作倡之人非但馬宗
李住兒二人而已驕悍之習漸不可長所據土官指
揮魯東通判張相叅將孟采貴雖難辭若將各官即
加調黜上下之分益復凌替以後各違肆行效尤何
以禁治干係紀綱相應通行議擬合候

命下移咨都御史戴才將魯東量加戒飭仍令魯相哈聰
協同管事鈐束土軍孟采張相聽本部與吏部酌量
年資應陞應調各另議處從違首惡姑不追究其馬
宗李住兒撫鎮衙門徧自禁治罪不得姑息因循

自壞法典嘉靖四十一年九月十四日題奉

聖旨是欽此

覆右給事中張鳴瑞追論南北誤事邊臣褫奪疏
題為陳膚見以備採擇事職方清吏司案呈本部送
吏科抄出工科右給事中張鳴瑞題奉

聖旨該部看了來說欽此欽遵抄出送司案呈到部看得
工科右給事中張鳴瑞所陳專責成以免分遣一事
大率謂各邊督撫等官徒知擁位糜祿視如傳舍全
不整理及至有事則又遣官代理不追曠職之罪欲
要已後邊事如前者追惟禍本壞自某人尚存者拏

解問擬已故者褫奪官爵恩蔭者革去祭葬者追還
各一節為照 朝廷設官分職各有攸司耕當問奴
織當問婢耕而無獲則罪坐於奴織而無衣則罪坐
於婢未有耕織無功使人代理奴與婢反得袖手旁
觀者也各處總督巡撫雖有南北不同均受

皇上重托乃敢因循玩愒坐壞兵事及至狼狽却令部臣
為之經略事體人情委屬乖舛除遼東連歲瓦解解薊
鎮諸兵雲集難以照常責備外其餘省鎮委如該科
所論合無通行申飭各邊總督鎮巡等官查照原擬
責任各將邊務加意整理錢糧不敷作何處置兵馬

不銳作何補練牆垣不備作何脩葺將領不材作何
更置倭虜采靖作何驅逐務臻實效毋事虛文以後
如再僨事聽各巡按御史從實叅奏恭候

宸斷及照彰往所以詔來懲前乃以警後以臣等耳目之
所覩記在北方壞事無如原任總督陝西三邊軍務
兵部右侍郎今病故魏謙吉初在甘肅山西兩鎮巡
撫大肆貪殘及至開府固原不理邊務專事苞苴以
致大虜深入花馬池一帶極其蹂踐謙吉方且多方
用賄以求內轉天奪其魄客死中途士論快之於後
不聞追論乃贈都察院右都御史矣又廢一子入監

讀書矣又給祭葬矣該科所謂當追奪於身後者正此一臣也在南方壞事無如提督軍務兼巡撫福建等處地方都察院右僉都御史王詢始以祭政一味孤媚遂得超陞巡撫蒞事之後百計惟貪一籌不展以致八閩群縣半成丘墟詢見公論不容詐病求免富甲一方士論鄙之于後不聞追論乃安享三品服色矣回籍之後又陞副都御史矣今又將圖起用矣該科所謂當追奪於生前者正此一臣也伏望聖明俯賜裁允將王詢削去官職列之編民魏謙吉所得贈廕祭葬通行追奪以為負國不忠者之戒此外

仍有失職冒榮如二臣者。聽科道官從實糾論。以定官常。以正法典。嘉靖四十一年九月十七日題奉聖旨。是朝廷待臣下恩禮不薄。却乃有等負上誤事的本當重處。姑依擬王詢著為民。不許朦朧起用。魏謙吉贈廕。祭葬。都追奪了。各邊兵務。你部裏便行與鎮巡等官加意整理。欽此。

覆督視侍郎葛縉責成邊臣繼理工程疏

題為恭進全遼圖說以備繼理工程事。職方清吏司案呈奉本部送兵科抄出督視遼東軍情。兵部左侍郎兼都察院右僉都御史葛縉題奉。

聖旨兵部看了來說欽此欽遵抄出送司案呈到部看得
督視遼東軍情兵部左侍郎兼都察院右僉都御史
葛縉題稱督脩過遼東河西緊要臺堡畫圖貼說乞
要備行巡撫都御史吉澄將未脩牆臺酌量衝緩以
為先後并要勅下薊遼總督加意總理各一節為
照遼東地方二三年來凋殘至極荷蒙

皇上軫念邊腹特遣重臣親詣督視河西一帶緊要臺堡
既稱俱已告完其餘未脩牆臺壕斬自是彼中督撫
之事况今天年稍豐兵氣漸揚委當脩舉之時所據
侍郎葛縉畫圖貼說具題前因無非求其善後之意

相應通行議擬合候

命下本部一面移咨彼處巡撫都御史查照葛縉圖說事
理通將該鎮未脩牆臺酌量衝緩稍待明年春暖卽
行整理合用工費就於見今脩築賞功餘剩銀五萬
餘兩內先行動支不敷之數徑自請討仍要選委廉
幹官員分區經理守巡各道不時督察務使絲毫悉
無侵冒尺寸足堪保障方為有益一面移咨薊遼總
督侍郎楊選薊鎮事體重大固當常在目前遼東事
勢劬勩不宜置之度外錢糧出入工程脩舉亦須加
意稽察方稱委任嘉靖四十一年九月二十一日題

奉

聖旨是欽此

覆右給事中張鳴瑞酌議平倭賞格疏

題為陳膚見以備採擇事武選清吏司案呈奉本部送吏科抄出工科右給事中張鳴瑞題奉

聖旨該部看了來說欽此欽遵抄出送司查得平倭事例凡水陸主客官軍民快臨陣擒斬有名真倭賊首一名顆者陞授三級不願陞者賞銀一百五十兩獲真倭從賊一名顆并陣亡者陞授一級不願陞者賞銀五十兩獲漢人脅從賊一名顆者陞署一級不願陞

者賞銀二十兩如在海洋遇賊有能邀擊沉溺舡隻
或追逐登山使賊不得近港如賊已近港有能奮勇
堵截使賊不得登岸如賊既登岸有能衝鋒破陣奪
其聲勢或追出境或逼下舡使地方不致被禍或所
部兵少而擒斬多者均以奇功論聽總督卽時具題
紀功巡按作速勘報超格陞賞如武將自守備把總
以下文官自海防民兵同知以下所領軍民兵勇五
百名部下臨陣擒斬真倭每五名顆陞一級十名顆
加一級一千名部下每五名顆陞署一級十名顆陞
實授一級各以則例遞陞至三級而止等因題奉

聖旨這條陳事件你每既會議停當依擬行欽此又查得
大明會典內開各衛指揮千百戶獲倭舡一艘及賊者陞
一級賞銀五十兩鈔五十錠在舡軍士生擒殺獲倭
賊一人者賞銀五十兩陸地交戰生擒殺獲一人者
賞銀二十兩擒斬達賊一名顆為首陞一級不賞為
從及傷故者給賞不陞又查得堂稿二人共擒斬達
賊一名顆為首與陣亡人員俱陞實授一級擒斬為
首不願陞者照例賞銀五十兩通查案呈到部看得
工科右給事中張鳴瑞條陳分南北以定賞格欲要
酌議以南方首級之三準北方之一又或陞賞雖同

革去世襲以示區別一節為照平倭賞格先年會典所載寔萬世畫一之規近日廷臣題議乃一時權宜之政在舊典則區別水陸而給賞要以示錫予之嚴在新例則槩及脅從以陞級無非昭激勸之義蓋緣此時倭患方殷人心畏縮縣重賞以賈忠勇因勢利導不為過舉但今法久弊滋該科所謂冒濫之弊誠為有之臣等竊惟賞以酬功無功者固不宜濫及功疑惟重有功者亦不宜輕棄今查浙江之功陞過三十餘員江南之功陞過四十餘員江北之功陞過二百四十餘員其他如王江涇乍浦之捷徐明山王直

之擒者功案尚多屢經行勘未見明報若不分真贋一槩裁削效死者未免解體若不嚴查覈經年停閣希功者終懷觀望相應通行酌處合候

命下移咨都察院轉行浙江南直三處巡按御史將前項各起獲功已經陞賞人員逐一清查要見何功為難當與會曲殺獲倭舡及賊者同科何功稍易當與會典殺倭一人者同科何功為直係應准世襲何功為脅從止終本身何人冒濫應該褫奪各另造冊具奏定奪其行勘未到者查係真功即使照例回奏查係冒功一面除名一面奏知文書到日通限三月以裏

務期至當極公不必避嫌遠怨以後所獲功次悉照會典定議有能擒斬有名直倭劇寇曾首一級者照會典殺獲倭舡及賊者陞一級賞銀五十兩鈔五十錠事例陞賞擒斬直倭從賊一級者照會典殺倭一人者賞銀五十兩事例願陞者依北虜一名顆陞一級不願陞者賞銀五十兩擒斬漢人脅從者止與給賞不陞如有冒報功次妄殺平民聽覈功御史指實叅奏其例前獲功弁陞過職級者候子孫襲替之日照例議處庶法令齊一士心感激嘉靖四十一年九月二十一日題奉

聖旨是欽此

覆監察御史林潤練鄉兵刷剩丁疏

題爲際遇

明時竭愚忠以少圖報塞事職方清吏司案呈奉本部送
兵科抄出巡按直隸監察御史林潤題奉

聖旨該部看了來說欽此欽遵抄出送司卷查先該巡按
直隸監察御史張九功條陳一款練鄉兵以省調遣
該本部覆奉

欽依備行各該督撫官者實舉行又爲懇乞

聖慈憫念地方災傷俯賜傳免額外加徵府第工銀以蘇

民因以固邦本事該刑部等衙門侍郎等官趙大佑等題節該本部覆奉

欽依備行河南撫按官將伊府護衛旗軍儀衛司校尉照依原額於正餘丁內揀選精壯者二千六百名令其守禦宿衛每名仍量留供丁三名以為軍裝之資其餘剩丁盡數查出俱發洛陽縣收籍編入圖甲納糧當差俱經通行欽遵外續准禮部咨為懇乞

天恩赦宥垂念親親憐憫宗室力微勢孤曲賜再造

天恩免勤 欽賜工價脩理已成牆垣前門並乞存留衛司餘丁免放遵奉勘合選買宮人以全親親國體事

欽定四庫全書
該伊王典模奏該禮部覆稱其護衛餘丁事隸兵部
掌行移咨徑自議覆外奉

聖旨牆垣照前旨改正宮人併餘丁准照舊欽此備咨前
來今該前因查呈到部看得巡按御史林潤具題前
因大率謂宗藩祿米日繁各處軍兵不練伊府違慢
事情乞要各該衙門詳議施行各一節為照團練鄉
兵免徵客戍節該本部覆奉

欽依備行各該督撫等官著實舉行目今浙江地方頗有
成效其餘各省玩愒如故甚至軍數消耗糧食虛冒
未當查究但欲差科道官分按校閱似為多事至於

伊府旗軍校尉額數先該本部議擬奉有

欽依以後朦朧奏請相應登案候

命下移咨各省督撫官查照本部節節題行事理督率兵
備軍衛等官各將土著鄉兵加意團練武藝開習者
編入行伍敢勇出衆者立為隊長務使人人精銳皆
可即戎毋得視為文具仍咨都察院轉行各該巡按
御史每遇巡歷地方弔取衛所冊籍從實校閱果有
成功具奏陞賞中間若有老弱逃亡虛冒糧餉者盡
行查革干碍職官一體叅究其伊府旗校仍照本部
原議於正餘丁內揀選精壯者二千六百名令其守

御宿衛每名量留供丁三名其餘剩餘丁盡數查發
洛陽縣收籍編入圖甲納糧當差該府如敢占悞不
發撫按即便從實糾奏撫按官如或容情不舉聽兩
京科道官通將撫按一併糾奏嘉靖四十一年九月
二十四日題奉

聖旨是伊府旗校剩丁著照原議查發當差不許占悞欽
此

覆湖廣總督都御史羅崇奎勘明播州宣慰司仍
隸四川管轄疏

題為解釋紛爭以安地方事職方清吏司案呈奉本部

送兵科抄出總督湖廣川貴軍務都察院右副都御史羅崇奎題奉

臣等兵部知道欽此抄出送司案呈到部看得總督湖廣川貴軍務右副都御史羅崇奎題稱查勘過播州土司緣由乞要將播州司仍隸四川分屬川東守巡重慶兵備三道管轄其貴州思石兵備照舊兼制仍於初內假之事權以便彈壓各一節為照播州土司自來雖隸四川然地方坐落去四川甚遠去貴州為近地方錢糧不輸納於貴州乃輸納於四川

皇上登極之初明見萬里已將播州改屬思石兵備道併

管兩省兼制甚得分職經野之意但播州之土官樂於縱逸屢有浮言貴州之兵道苦無事權每見掣肘守臣交口辨析幾成聚訟奸逆屬目觀望大肆陸梁國體人情可謂兩失之矣既該總督都御史羅崇奎具題前來計處明悉相應通行議擬合候

命下將播州宣慰司照舊仍隸四川分屬川東守巡重夔兵備三道管轄一應進貢表文襲替等項照舊綜理其貴州思石兵備道仍令兼制播酉平邑等土司催徵糧馬問理詞訟操練軍兵勦除賊盜糾查姦弊事于夷情小則徑自拏問處治大則具呈總督撫按衙

門參奏本部請換勅書一道備將前項事情增載
於內齎付思石兵備道欽遵行事一面移咨羅崇奉
將宜慰楊烈等嚴加切責永為遵守以後再敢執迷
不悟藉口四川所屬不服思石鈐束

國典具存決不輕貸其兩省該道凡事俱要協和計議
以靖地方不得自分彼此致妨大計違者亦聽巡按
御史指名奏究嘉靖四十一年九月二十四日題奉
聖旨是欽此

覆劄鎮督撫官楊選等請命憲臣閱兵驗補練疏
題為申議補練主兵及減調客兵事宜以便遵守事職

方清吏司案呈奉本部送兵科抄出總督薊遼保定等處軍務兼理糧餉兵部右侍郎兼都察院右僉都御史楊選整飭薊州等處邊備兼巡撫順天等府地方都察院右僉都御史徐紳題俱奉

聖旨兵部看了來說欽此通抄送司案呈到部看得總督軍務右侍郎楊選巡撫右僉都御史徐紳各題稱薊鎮補兵練兵與客兵減調事宜欲要行令巡按巡關御史再加閱視各該降級將官應否復職斟酌題請各一節為照薊鎮補練主兵一事去歲仰蒙

聖旨長駕遠馭既將舊任諸臣通行降罰又令新任督臣

嚴加訓練一時人心甚知警惕但自去歲九月以來
至今又將一年若不舉行閱視勤者無以自見惰者
得以苟容玩日愒月殊無振勵之期既該督撫官侍
郎楊選等具題前來係于邊政相應依擬合候

命下移咨都察院轉行順天巡按御史會同東西巡關御
火親詣各區嚴加簡閱每區要見主兵已補若干未
補若干已練若干未練若干何區精強堪以禦虜何
區脆弱不堪禦虜何將訓練有功應該優錄降級者
應否復職何將訓練無功應該究治降級者仍當照
舊通候防秋畢日將總督鎮巡兵備等官分別回

奏其楊選等條陳三事合就開立前件議擬上請定奪嘉靖四十一年九月二十七日題奉

聖旨是欽此

一補兵之宜看得薊鎮標遊策應之兵多係各區主守之額一向未經頂補原缺以致清勾紛紛難充實數合無備行督撫官照依所擬通查該鎮之兵不分主守標遊總計合額若干應補若干見缺若干其見在標兵項下者就行查入各區冊內充頂額數以後不得重複勾擾至於日後清勾之法委為經久之規亦聽彼中徑自議處施行

一練兵之宜看得激勸人心在公賞罰欲行賞罰在定等則該鎮上自副總下至提調均有練兵之責但所統之兵多寡不一所練之藝高下不齊以致官有遷轉任有久近委難一槩定其賞罰合無備行巡按巡關御史日下閱視之時務要分別人數多寡較其司射司器之藝以為差等辨其兼管分管之責以為次第某官在任最久賞罰宜重某官在任未久賞罰宜輕逐一分別從實具奏以昭勸懲

一邊兵難減之說看得遞減邊兵本部原為主兵練成而言但薊鎮之事委非往時可比地勢之難徧人

事之難測誠如督撫官所論合無備行巡按巡關御史目下閱視之時要見各區兵馬已未訓練果否足恃入衛邊兵應否遞減毋拘成議務垂永圖徑自回奏以憑覆議

覆宣大巡按御史董學青成督撫等官勦虜疏
題為大舉虜賊東西夾犯事勢孔棘懇乞

聖恩嚴勅總督大臣會兵勦逐事職方清吏司案呈奉本部送該巡按直隸監察御史董學揭帖前事又准總督宣大山西等處地方軍務兼理糧餉太子少保兵部尚書兼都察院左副都御史江東揭帖為聲息事

等因送司案呈到部看得蠢茲醜虜今秋垂涎者全
在薊鎮以故於大同地方乍進乍退實欲誘我兵馬
盡數西援方馳騁於東後見薊鎮之備極其嚴密于
今冬月已臨擁衆復入新平天城等處臣等計料此
虜草旣焚燒馬無所食壁又堅固野無所掠在臨邊
則必謀攻邊墩在近邊則必謀攻邊堡急當發兵逐
勦以靖地方合候

命下馬上差人移文總督尚書江東趨今南山稍靜多發
兵馬於順聖川東西城及懷安天城陽和一帶隨處
設伏如遇分犯各堡應守則守必使萬無一失應戰

則戰務期一日三捷方稱

聖明委任至意一面備行宣府總兵官馬芳巡撫都御史
趙孔昭相機截勦一面通行保定總兵官祝福巡撫
都御史李遷嚴謹關隘以防意外之虞卽今天氣尚
暖畿輔爲重江東仍駐懷來另候緩急以爲進止嘉
靖四十一年十月初八日題奉

聖旨是著江東等各相機戰守不許疎怠仍行薊鎮嚴行
隄備欽此

復江廣等處紀功御史段顧言等覈勘勦平逆寇
張璉等功賞疏

題爲仰仗

天威平逆功成謹遵 勅諭核實上請伏乞

聖明俯賜勸懲以彰 國典事職方清吏司案呈奉本部
送兵科抄出江西廣東等處紀功監察御史段顧言
題又該提督兩廣軍務兼理巡撫兵部右侍郎兼都
察院右僉都御史張臬題爲勦平逆寇查覈功罪以
明賞罰事總督浙直福建江西等處軍務兼巡撫浙
江地方少保兼太子太保兵部尚書兼都察院右都
御史胡宗憲題爲仰仗 玄威三省會舉搗巢飛報
捷音事巡撫南贛汀漳等處地方提督軍務都察院

右副都御史陸穩題為三省奉 旨會勦逆寇巢穴
報捷事提督軍務兼巡撫福建地方都察院右僉都
御史游震得題為三省奉 旨會勦逆寇搗巢報捷
事俱奉

聖旨兵部知道欽此欽遵通抄送司卷查先該巡按江西
監察御史段顧言題為仰仗

天威逆賊授首恭先飛報捷音上慰

聖懷南顧事巡撫南贛汀漳都御史陸穩題為擒獲謀反
大逆賊首飛報捷音事提督兩廣軍務兵部右侍郎
張臬鎮守兩廣總兵官征蠻將軍平江伯陳王謨會

題為飛報擒獲

賊徒首事節制

欽依移咨都察院轉行紀功御史段顧言會同廣東江西

福建各該巡按御史通將各省有功有罪人員逐一

覈勘的實作速具奏報捷人員在張臬則差吏目李

時中舍人劉瑞陳王謨則差舍人夏國紳馮潔在陸

穩則差承差鄒海在段顧言則差署指揮僉事黎承

承差方子明通候覈勘至日照例具題以示激勸又

該本部題為江西賊情過限未見平寧乞為查催以

靖地方事又為仰仗

天威急勦叛逆以靖地方事俱經題奉

欽依將御史段顧言仍留江西監軍兼紀廣東功罪功成之日不拘巡按常例一體甄錄又該本部題議得總兵官劉顯副總兵俞大猷統兵不滿二千隨經題奉欽依備行湖廣總督鎮巡官即行叅政彭翼南將永保二司土兵挑選二萬整棚停當聽本部齎文啓行如賊已平兵不必調亦聽本部將彭翼南具實奏請特賜金幣以為効忠之勸又查得

大明會典內一款報捷官舍人等以擒斬虜賊多寡為等第七十名顆以上賞鈔一千貫衣服一套九十五名顆以上陞一級一百一十名顆以上賞衣服一套陞

試所鎮撫欽此俱經通行欽遵外今該前因通查案
呈到部看得江西廣東等處紀功監察御史段傾言
題稱查勘過廣東南嶺等處擒獲賊首張鍊蕭雪峰
等各該効勞人員有功有罪緣由及稱督撫鎮守諸
臣如尚書胡宗憲侍郎張臬都御史陸穩胡松平江
伯陳王謨功當重錄都御史游震得功過相率副使
馮臯謨叅議皇甫渙僉事金淵賀涇盧岐嶷張冕知
府何鍾桂嘉孝副總兵王寵俞大猷叅將張四維門
崇文祝明鍾坤秀都司謝勅冠帶把總陳其可所當
首錄叅政譚綸趙鐸賀鏤陳惟舉邵梗叅議秦宗道

同知呂天恩毛汝麒推官劉宗寅鄧士元周弘祖汪
若洋知州畢竟立副總兵楊縉都司王銳遊擊盧錡
原任叅將丁僅原任都司來熙把總傅應嘉所當併
錄內賀鏤軍前身故所當錄恤南京兵部尚書李遂
中府署都督僉事今充總兵官劉顯均乞

聖鑒新民郭玉鏡江滿清劉剛等計獲張璉原擬重賞授
官應否俯從或別加議處及叅稱指揮嚴愷等所當
提問又該兩廣提督侍郎張臬總兵官陳王謨浙直
總督尚書胡宗憲南贛提督都御史陸穩江西巡撫
都御史胡松各具題與御史段顧言大略相同在張

臬則又稱布政使徐需叅將金堂叅議蔡文僉事夏
棡勤勞獨至副使陶大年莊朝賓原任叅將張裕知
府顧言等所當均敘生員謝弋鳳軍人畢鉉共能計
獲謀主畢鉉已授冠帶總旗謝弋鳳合當特授一職
同知呂天恩知州畢竟立曉暢戎務應陞本省或廣
西各相應憲職舉人吳與言已行禮獎建坊郭玉鏡
等已准贖罪重賞冠帶蘭州土官男韋應龍向武州
土知州黃仲金并男黃九疇應否量加服色實授原
任僉事齊遇等所當免究指揮馮良佐等所當准贖
在胡宗憲陸穩則又稱叅政張瀚叅議黃肱僉事譚

臬都司李涇知府楊世芳楊敷周璞等功當同論在
胡松則又稱叅政陳大賓副使陳柯叅議崔都僉事
崔近思都司王銳把總郭成所當優錄知府張國珍
劉炯所當嘉錄各一節除巡按御史例不論功舉人
吳與言已經軍門禮獎建坊巡撫游震得功過相準
并其餘功疑者俱不敢槩及外為照廣東之捷二逆
就縛四省救寧寔皆我

皇上神籌獨得廟略無遺所致玄功顯赫薄海內外罔不
震聳一時封疆諸臣果有何勞但既該御史段顧言
侍郎張臬等交章具題前來臣等逐一叅詳大率督

鎮等官親臨巢穴者當為首功偏裨司道戮力宣猷
者當為次功督撫等官遙制應援者當為又次之功
即如提督兩廣軍務侍郎張臬方膺專閫之寄即發
竊伏之奸提一億之精兵渠魁落膽宣

九重之德意脅從歸心鎮守兩廣總兵官平江伯陳王謨
精兵壯盛意氣安閑既能同心於提督全無忌刻之
私不聞異見於偏裨雅有含弘之度以上二臣功當
首論提督南贛軍務右副都御史陸穩有料敵之明
有知人之智善用俞叅將之謀免玉石俱焚之慘能
通段御史之志成弛張兼濟之勲原任紀功御史今

陞浙江副使段顧言擲作金聲動成石畫計處兵間
之事如在目前協贊閫外之機運諸掌上以上二臣
功當同論總督浙直江福軍務尚書胡宗憲巡撫江
西都御史胡松雖無蹈危履險之蹟均有指示發蹤
之略以上二臣功亦當論其餘隨軍効勞文臣如副
使馮臯謨等武臣如副總兵俞大猷等均有可錄係
于激勸相應通行議擬合候

命下將張臬陳王謨特加陞賞仍與錄蔭陸穩段顧言厚
加陞賞俞大猷張四維門崇文馮臯謨金剡賀涇盧
岐黃何鏗同加陞賞

謝勅陳其可趙鏘呂天恩毛汝麒劉宗寅鄧士元周
弘祖汪若泮畢竟立楊縉王銳盧錡丁僅來熙傅應
嘉量加陞賞呂天恩畢竟立仍咨吏部註擬兩廣相
應衙門以便效用胡宗憲胡松厚加賞賚譚論陳柯
同加獎賞劉顯陳惟舉邵梗秦宗道徐需金堂蔡文
夏棣陶大年莊朝賓張瀚黃肱譚某陳大賓崔都崔
近思郭成張國珍劉炘李涇楊世芳楊敷周璞厚加
賞賚內馮臯謨金澍張晃趙鏘陳柯桂嘉孝邵梗何
鏜張四維仍與顧言等俱准開俸叅政賀鏐死事可
憫量贈一官謝弋鳳設謀可嘉量授所鎮撫填註附

近原籍衛分原任僉事等官齊遇等十一員指揮等
官馮良佐等九員准其贖罪原任叅將等官張裕等
一百二十二員各該總督軍門分別犒賞指揮嚴愷
等十二員各該巡按御史提問具奏報捷人員吏目
李時忠等照例各陞三級仍各賞末服一套掾史薛
紹等移咨吏部查例施行再照新民郭玉鏡江滿清
劉剛等計獲張璉之功亦難輕泯合無准其贖罪仍
聽軍門就彼填註劄付給與冠帶充為千總以圖後
效及照湖廣永保二司土兵雖未啓行亦有微勞合
無遵照原奉

欽依事內量賜金幣以慰其心仍令該管督撫嚴加禁諭
不許越境生事其廣東土官韋應龍黃仲金等應不
陞賞仍聽張臬分別具奏另行議處但 恩威出自

朝廷嘉靖四十一年十月初八日題奉

聖旨這逆賊就擒各官效有勞績張臬陞右都御史廕一
子入監讀書陳王謨加太子太保廕一子與做錦衣衛
百戶各照舊提督鎮守陸穩陞兵部右侍郎兼右僉都
御史照舊巡撫段顧言於今職上陞一級俞大猷等各
陞一級張冕等陞俸一級胡宗憲賞銀五十兩紵絲四
表裡胡松四十兩三表裡譚綸等三十兩二表裡劉顯

等二十兩一表裡賀鏐贈光祿寺卿齊遇等免究馮良
佐等准贖罪張裕等軍門分別犒賞嚴愷等各該巡按
御史提了問永保二司官各賞銀三十兩紵絲二表裡
其餘依擬欽此

覆江西巡按御史段顧言勘明流賊功罪陞賞疏
題爲地方節次失事類覈各官功罪據實上請伏乞
聖明通賜勸懲飭

國法以肅人心事職方清吏司案呈奉本部送兵科抄
出巡按江西監察御史段顧言題奉

聖旨兵部知道欽此欽遵抄出送司案呈到部看得巡按

江西監察御史段顧言題稱查勘江西地方節
流寇入境各該官員功罪緣由除總督胡宗憲提督
陸穩副總兵俞大猷廣東功次內俱已論敘及各官
功罪已經先行賞罰過者并例不當論功者俱無容
別議外為照江西地方節被流寇為害仰賴

聖皇在上玄威遠布以故將兵用命克致平寧所據効勞
人員既該紀功御史段顧言具題前來內巡撫都御
史胡松選兵選將盡除積歲之妖氛兵備副使陳柯
宣力宣猷竟收一時之偉績恭政譚綸墨線從戎赤
心任事紀功官既稱其設謀督守保障有賴似難輕

民御史段顧言廣東之捷猶為一節江西之靖乃其全功係干激勸相應通行優敘合候

命下將胡松陳柯同加陞賞段顧言量加賞賚移咨吏部遵照 欽陞一級註擬相應職銜譚綸量加陞級候服闋之日敘用知府謝鵬舉知縣樂舜賓陳瓚千戶劉添榮賈勇陳倫王孚余涵黃允中重加賞賚指揮張斌等二十四員准其開俸叅議楊守魯僉事李正彝知府等官陳元琰等四十二員免其究治千戶陳試蕭珍石壁照舊仕俸知府江珍照依才力不及事例移咨吏部酌量調用百戶程寵照例贈正千戶例

男保送赴部襲陞二級巡檢黃尚正劉茂照例伊男
准給冠帶仍免本身差役千戶潘吉等十員巡撫衙
門分別獎賞百戶等官陳澤等三十三員巡按御史
提問具奏嘉靖四十一年十月初十日題奉

聖旨這地方流寇蕩平胡松陞兵部右侍郎兼右僉都御
史照舊巡撫陳柯譚綸各陞一級段顧言賞銀十五兩
紵絲一表裡謝鵬舉等各二十兩一表裡張斌等准開
俸楊守魯等免究陳試等照舊住俸江珍送部調用陳
澤等巡按御史提了問其餘依擬欽此

遵諭預飭春防疏

題爲欽奉

聖諭事職方清吏司案呈奉本部送嘉靖四十一年十月十八日卯時該內閣傳奉

聖諭至於北賊亦要嚴防欽此傳奉到部送司案呈到部臣等看得即月冬寒草枯水凍東則薊遼二鎮西則陝西三邊全無警報宣雲地方雖有散寇出沒止在沿邊昨據總兵官馬芳等揭報已趨柴溝北山仰仗聖皇在上玄威遠布今歲之事頗爲寧謐但猾虜之情誦詐更爲不常守邊之略須臾不容少間嚴防之諭誠如聖慮除馬上齎文通行陝西宣大薊遼總督等

官督率兵將悉心防禦毋恃久之不來亟為明春之
備無以虜之已去速圖去後之策慎而又慎務保萬
全嘉靖四十一年十月十八日題奉

聖旨是欽此

遵諭議靖南北寇虜疏

題為欽奉

聖諭事職方清吏司案呈奉本部送嘉靖四十一年十月
二十二日該內閣傳奉

聖諭南孽北氛未靖盡所司要計處欽此欽遵傳捧到部
送司案呈到部臣等看得倭虜之患寇盜之警自昔

盛世所不能免是故虞舜之時初則猾夏後則來王
周宣之時始則匪茹終則來威顧所以制禦之者如
何耳即如今歲南有逆璉跳梁於廣中日弄潢池之
兵北有逆富縱橫於漠外時肆侵軼之計軍書疊至
羽檄交馳不可謂之無事矣仰賴

聖皇在上玄威震懼

廟筭淵微富既就殪璉亦成擒三軍知必勝之方四海見
永清之路臣等待罪本兵自擊捷音無任欣慶但北
之秋防雖畢轉盼入春亟當為防春之備南之大難
雖靖餘孽尚在不可無掃蕩之圖大抵北之患大猶

之癰疽也及其未潰而消之為力頗難南之患小猶
之癰疥也乘其未盛而除之為力則易茲蒙

天語叮嚀責令臣等計處聖神文武動出萬全臣等愚昧
敢不仰承謹將南孽北氛大且要者上請伏望

俯賜采覽勅下遵行地方幸甚臣等幸甚嘉靖四十一年
十二月二十二日題奉

聖旨是欽此

一南方之孽在廣東則張璉蕭雪峰林朝曦王伯宣
謝高山子李逢時黃景政詹世旺徐東洲在福建則
李占春呂尚四江一峰蔡錦塘許六使鄧惠銓在江

西則李文彪謝允樟賴清規節據各該鎮巡等官奏
報前項各起賊寇俱已擒滅林朝曦一箇見在立功
李文彪三巢近行勘處所據未獲餘孽如廣兵袁三
等雖非大患若不早為驅除寡而能衆弱而能強未
免將來益復滋蔓况總督尚書胡宗憲見在福建專
為親勦閩寇相去甚便合無容臣等嚴行胡宗憲并
右都御史張臬平江伯陳王謨侍郎陸穩胡松都御
史游震得總兵官劉顯副總兵俞大猷楊繼督率將
兵先將袁三等多方搜勦其餘但係有名巨寇果未
盡靖趁今兵威振揚相機區處中間若有脇從之徒

一體撫卹以廣我

惠愛元元之意如果地方全寧原無別故亦要從實
回奏

一北方之氛大率以防守薊鎮為重至於宣天山西
則薊鎮之右腋遼東則薊鎮之左腋陝西三邊雖如
四肢疾痛相關均不可緩即目冬寒固為小妥來歲
春明殊可深憂蓋今秋虜所垂涎專在薊鎮既不得
逞其心未肯但已合無容臣等移咨總督侍郎楊選
目下先將應留入衛兵馬與同各區主兵加意整飭
器械不備作何處給錢糧不敷作何處置墩堡未完

作何脩葺應徑行者徑自舉行應呈奏者以次呈奏
寧為先事之圖毋貽後時之悔宣府大同山西三鎮
總督江東巡撫陳其學趙孔昭楊宗氣趁今虜退一
應戰守事宜各要從長區處其遼東地方先該本部
侍郎葛縉已將廣寧以西墩堡脩理完備其廣寧以
東墩堡督撫官仍要及時營繕不許玩愒至於陝西
三鎮苦於入衛頻仍各城戰馬倒損數多已該臣於
別本內議發太僕寺馬價銀四萬餘兩買補馬匹專
備入衛軍士騎征但惟各邊之事一切機宜俱在間
外必須督撫官加意舉行方為有濟如敢徒事虛文

不脩實政聽臣等與該科指名叅究

覆江西巡按御史陳志請勦鄰境山海賊寇疏

題爲閩省山海賊寇縱橫未已地方萬分傷殘復害鄰境懇乞

聖明申飭將臣恪遵 明旨速勦督撫諸臣加意經略以
救生民事職方清吏司案呈奉本部送兵科抄出巡
按江西監察御史陳志題奉

聖旨兵部知道欽此欽遵抄出到部送司卷查先爲欽奉
聖諭事該本部題議得福建延建等處未獲餘孽如廣兵
袁三等仍嚴行總督尚書胡宗憲并右都御史張臬

平江伯陳王謨侍郎陸穩都御史游震得總兵官劉顯副總兵俞大猷楊縉會兵夾勦奉

聖旨是欽此又爲捷音事該征勦廣福南贛等處地方總兵官南京中軍都督府僉書署都督僉事劉顯奏該本部議得福建等處各該守臣自分彼此賊稍急惟恐客兵之不來少緩惟恐客兵之不去人情兵計均屬未妥本部仍行劉顯即便前去會同游震得胡松陸穩俞大猷楊縉將延建餘賊作速勦除各該撫鎮等官仍要於劉顯虛心協謀共成大事奉

聖旨是欽此俱經通行欽遵去後今該前因查呈到部看

得巡按江西監察御史陳志題稱福建建寧興化地方殘寇未寧總兵劉顯副總兵俞大猷已奉

明旨前去會勦近因巡撫游震得屢咨阻止遲疑不進乞要申飭劉顯直抵興建設法征勦俞大猷令從漳泉相機夾勦及稱原任叅將侯熙坐視殃民所當追論并要轉行巡撫游震得將殘傷地方軫恤懷來總督胡宗憲親往福建督行勦賊各一節除侯熙先已革任無容別議外為照福建賊情節該本部議行總督尚書胡宗憲親詣地方督勦總兵官劉顯副總兵俞大猷會兵叶勦俱已奉有

欽依昨據南贛都御史陸穩揭稱程鄉賊首林朝職已經
生擒今日總督尚書胡宗憲又揭稱浙兵援福一月
之間轉戰千里八年積寇一朝而盡計其功次似在
御史陳志具奏之後但叛兵素三尚未勦除相應通
行申飭合候

命下本部仍行游震得公同劉顯俞大猷再加查勘如果
建延興福等處尚有山海餘寇并將素三等作速勦
除徑自回奏提督等官務要協心計議共成大事不
得自分彼此阻撓軍機叅游等官務要摧鋒陷陣方
為首功不得拘泥招安以滋民患違者俱聽巡按御

史指名參究至於該省賊經處所凋殘至極加意拊
循全在巡撫踏勘災傷寬免徵役并逐貪暴一切善
後事宜應行應奏者悉聽游震得早為計處以副委
任此後地方如果十分平寧御史陳志即將劉顯官
兵一面隨宜安插一面作速具奏候有
明旨處分方許出境嘉靖四十一年十一月初六日題奉
聖旨是欽此

楊襄毅公本兵疏議卷九終